

JABATAN KORPORAT

TARIKH: 27.11.2024 MASA: 04.00PM

MUKTAMAD



MAJLIS BANDARAYA SEBERANG PERAI

TEKS UCAPAN
YANG BERBAHAGIA DATO' HAJI BADERUL AMIN BIN
ABDUL HAMID
DATUK BANDAR SEBERANG PERAI

SEMPENA
MAJLIS PENYAMPAIAN HADIAH PERTANDINGAN
PENDIDIKAN HIJAU DIGITAL SEKOLAH RENDAH DAN
SEKOLAH MENENGAH PIALA DATUK BANDAR
SEBERANG PERAI

TARIKH / MASA / TEMPAT
30 NOVEMBER 2024 (SABTU)
11.00 PAGI

KILANG AMPHENOL TCS, BUKIT MINYAK
SEBERANG PERAI SELATAN

Disediakan oleh Jabatan Korporat

Ucapan YBhg. Datuk Bandar MBSBSP 2024

Terima kasih Saudara/Saudari Pengacara Majlis

Yang Berbahagia Datuk Seri Lee Tiong Li
Regional Manager Amphenol TCS

Yang Dihormati Profesor Dr Che Zalina Zulkifli
Ketua Pusat Pendidikan Hijau
Universiti Pendidikan Sultan Idris

Yang Dihormati Cik Tan Layean
Pengurus Karomech

Yang Dihormati Whip Ahli Majlis
En Bernard Cheen Goon Hoi
En Muhamad Suzuki Bin Ahmad
Whip Ahli Majlis
Majlis Bandaraya Seberang Perai

Yang Dihormati Ahli-Ahli Majlis
Majlis Bandaraya Seberang Perai

Yang Berusaha Tuan Mohd Ibrahim Bin Md Nor
Setiausaha Bandaraya

Ketua-Ketua Jabatan dan Pegawai-Pegawai Kanan
Majlis Bandaraya Seberang Perai

Pelajar-Pelajar Sekolah

Rakan-Rakan Media

Tuan-Tuan dan Puan-Puan yang dihormati sekalian

.....

Bismillahir Rahmanir Rahim

Assalamu'alaikum Warahmatullahi Wabarakatuh,

Selamat Pagi dan Salam Sejahtera,

1. Alhamdulillah, saya memanjatkan kesyukuran ke hadrat Allah S.W.T. kerana dengan izin dan limpah kurnia-Nya kita dapat bersama-sama pada pagi ini dalam **Majlis Penyampaian Hadiah Pertandingan Pendidikan Hijau Digital Sekolah Rendah Dan Sekolah Menengah Piala Datuk Bandar Seberang Perai**.
2. Sekalung penghargaan dan terima kasih kepada Datuk Seri Lee Tiong Li, Pengarah Amphenol TCS & Karomech Sdn. Bhd., atas kesudian menaja program ini. Kerjasama seperti ini menjadi contoh terbaik bagi hubungan strategik antara sektor korporat dan Pihak Berkuasa Tempatan dalam menjayakan program berimpak tinggi demi manfaat bersama. Sesungguhnya, keprihatinan dan sokongan ini amat dihargai.
3. Setinggi-tinggi penghargaan juga kepada para panel penilai Yang Berusaha Dr. Khairuddin bin Nisa, Pegawai *School Improvement Specialist Coach* (SISC) & Sains Sosial dari Pejabat Pendidikan Daerah Bagan Datuk; Puan Normah binti Dali, Penolong Kanan HEM SMK Khir Johari; sekolah-sekolah yang terlibat dan para hadirin sekalian yang hadir bagi menjayakan program pada hari ini.

4. Majlis Penyampaian Hadiah ini merupakan inisiatif berimpak tinggi yang bertujuan untuk memupuk kesedaran dalam kalangan murid dan pelajar mengenai kepentingan menjaga alam sekitar. Program ini juga memainkan peranan penting dalam merealisasikan aspirasi Pendidikan Digital Negara MADANI, selaras dengan usaha melahirkan generasi muda yang celik teknologi dan berdaya saing dalam pembangunan lestari. Selain itu, majlis ini turut berupaya meningkatkan kesedaran pihak sekolah dalam menjayakan konsep Sekolah Hijau, sejajar dengan matlamat ke arah komuniti yang lebih lestari dan bertanggungjawab terhadap alam sekitar.
5. Untuk makluman semua, Pertandingan Hijau Digital atau *Edu-Green* ini merupakan inisiatif strategik hasil kolaborasi erat antara Majlis Bandaraya Seberang Perai (MBSP), Universiti Pendidikan Sultan Idris (UPSI), dan Kementerian Pendidikan Malaysia. UPSI telah memainkan peranan sebagai penasihat utama dalam pembangunan Pendidikan Hijau Digital ini sejak peringkat awal pelaksanaannya. Melalui kerjasama ini, MBSP bersama UPSI telah berjaya memperkenalkan Pendidikan Hijau Digital peringkat sekolah yang telah dilancarkan secara rasmi pada 13 April 2019.
6. Pendidikan Hijau Digital merupakan alat pembelajaran berbentuk permainan pendidikan digital (*Digital Education Tools*) yang dikenali sebagai *Edutainment*. Permainan ini dirangka berdasarkan prinsip pedagogi pendidikan, di mana elemen pembelajaran disepadukan

dengan hiburan secara interaktif. Permainan Pendidikan Hijau Digital ini menekankan penyelesaian cabaran dalam tempoh masa yang ditetapkan, sekali gus menggalakkan daya kreativiti, pemikiran kritis, dan kesedaran terhadap amalan hijau dalam kalangan pelajar.

7. Pertandingan ini dibahagikan kepada tiga (3) kategori yang dirancang khusus untuk meningkatkan pemahaman dan kesedaran pelajar terhadap kelestarian alam sekitar melalui pendekatan kreatif dan inovatif. Kategori-kategori tersebut adalah:
 - i. Kategori 1 – Sekolah Rendah: *Ocean Zero Trash*;
 - ii. Kategori 2 – Sekolah Menengah: *Welcome2Compost*; dan
 - iii. Kategori 3 – Sekolah Rendah dan Sekolah Menengah: *Rubbish War*.
8. Tempoh percubaan bagi pertandingan ini telah dilaksanakan dari 22 Julai 2024 hingga 31 Ogos 2024, bertujuan untuk memastikan kelancaran pelaksanaan serta keberkesanan mekanisme pertandingan. Pertandingan secara rasmi telah dimulakan pada 1 September 2024 dan berlangsung sehingga 30 September 2024.
9. Penyertaan bagi pertandingan ini amatlah menggalakkan dengan sebanyak 43 buah sekolah mengambil bahagian dalam pertandingan ini. Daripada jumlah tersebut, sebanyak 15 buah sekolah telah berjaya melayakkan diri ke peringkat akhir. Hadiah bagi pertandingan ini

disediakan sebagai penghargaan kepada usaha, kreativiti, dan komitmen para peserta. Pemenang pertandingan akan menerima hadiah berupa wang tunai serta sijil digital yang diiktiraf, sebagai simbol kejayaan dan pencapaian mereka dalam menyemarakkan semangat Pendidikan Hijau Digital.

10. Saya berharap sokongan erat daripada pihak penaja, iaitu Edu-Green Digital Amphenol TCS dan Karomech Sdn. Bhd., dapat meningkatkan kesedaran di kalangan sekolah mengenai kepentingan menjayakan inisiatif Sekolah Hijau. Usaha kolektif ini mencerminkan komitmen bersama ke arah pendidikan yang lebih lestari dan berdaya maju.
11. Saya mengucapkan setinggi-tinggi Tahniah dan Syabas kepada semua pemenang yang akan diumumkan sebentar lagi. Kejayaan anda adalah bukti usaha gigih, kreativiti, dan dedikasi dalam menjayakan Pendidikan Hijau Digital. Bagi mereka yang tidak berjaya, jangan berputus asa. Jadikan pengalaman ini sebagai pemangkin untuk terus berusaha dan memperbaiki pencapaian di masa hadapan. Ingatlah, setiap langkah adalah satu kejayaan dalam perjalanan menuju kecemerlangan.
12. Akhir kata daripada saya, marilah sama-sama kita menjaga alam sekitar ini dan menjadikan Seberang Perai Aspirasi Bandar Masa Hadapan.

Sekian, terima kasih.

***Wabillahi Taufik Wal Hidayah, Wassalamualaikum Warahmatullahi
Wabarakatuh.***